

BOSNA I HERCEGOVINA
FEDERACIJA BOSNE I HERCEGOVINE
BOSANSKO - PODRINJSKI KANTON GORAŽDE
OPĆINSKI SUD U GORAŽDU
Broj predmeta: 045-0-F1-26-000 001
Goražde, 09.02.2026. godine

OPĆINSKI SUD U GORAŽDU, sudija Lejla Ferhatović, u postupku upisa podataka u Registar političkih organizacija koji se vodi kod Općinskog suda u Goraždu, a na temelju prijedloga za brisanje političke organizacije: Stranka za bolje Goražde, podnesenom od strane Centralne izborne komisije BiH, Središnje izborno povjerenstvo, broj: 03-07-6-149-1/26 od dana 29.01.2026. godine, van ročišta, dana 09.02.2026. godine donio je:

R J E Š E N J E

Utvrđuje se da politička organizacija: Stranka za bolje Goražde, upisana u Registar političkih organizacija rješenjem broj: 045-0-F1-13-000 001 od dana 23.12.2013. godine, ne obavlja djelatnost utvrđenu Statutom duže od godinu dana.

Iz Registra političkih organizacija koji se vodi kod Općinskog suda u Goraždu, briše se iz politička organizacija: Stranka za bolje Goražde.

Obrazloženje

Dana 05.02.2026. godine Centralna izborna komisija BiH, Središnje izborno povjerenstvo, Sudu je dostavila prijedlog za brisanje političke organizacije: Stranka za bolje Goražde iz Registra političkih organizacija koji se vodi kod Općinskog suda u Goraždu, broj: 03-07-6-149-1/26 od dana 29.01.2026. godine.

U prijedlogu navodi da je, provodeći odredbe Izbornog zakona Bosne i Hercegovine i Zakona o finansiranju političkih stranaka, Centralna izborna komisija BiH u okviru svojih nadležnosti, izvršila uvid u službene evidencije i utvrdila da Stranka za bolje Goražde, upisana u sudski registar kod Općinskog suda u Goraždu rješenjem broj: 045-0-F1-13-000 001 od 23.12.2013. godine, duži vremenski period ne izvršava zakonom propisane obaveze, zbog čega postoji osnovana sumnja da politička stranka faktički ne obavlja djelatnost utvrđenu svojim statutom. Naime, odredbom člana 24. stav 1. tačka 4. Zakona o političkim organizacijama („Službeni list SR BiH". broj 27/91 - preuzet u Federaciji Bosne i Hercegovine) propisano je da politička organizacija prestaje sa radom ukoliko se utvrdi da ne obavlja djelatnosti utvrđene statutom u periodu dužem od jedne godine. U tom smislu, neizvršavanje zakonskih obaveza, naročito kontinuirano nedostavljanje finansijskih izvještaja i neparticipiranje u izbornim procesima, predstavlja jasan pokazatelj da politička stranka ne djeluje u skladu sa svrhom zbog koje je osnovana. Uvidom u službene evidencije Centralne izborne komisije BiH utvrđeno je da Stranka za bolje Goražde nije dostavljala godišnje finansijske izvještaje propisane članom 12. Zakona o finansiranju političkih stranaka za 2021, 2022, 2023. i 2024. godinu, nije podnosila prijavu za učešće na Općim izborima 2022. godine i nije podnosila prijavu za učešće na Lokalnim izborima 2024. godine. Pored navedenog, Stranka za bolje Goražde je dana 15.04.2021. godine dostavila Centralnoj izbornoj komisiji Odluku Skupštine Stranke za bolje Goražde o prestanku rada političke stranke broj: 05/21 od 30.03.2021. godine.

Imajući u vidu navedeno, Centralna izborna komisija BiH smatra da su ispunjeni zakonski uslovi za prestanak rada Stranke za bolje Goražde, te za njeno brisanje iz sudskog registra, u skladu sa članom 24. stav 2. Zakona o političkim organizacijama.

Uz navedeni prijedlog Centralna izborna komisija BiH Sudu je dostavila sljedeću dokumentaciju: pregled političkih stranaka koje nisu dostavile godišnji finansijski izvještaj za 2021. godinu, pregled političkih stranaka koje nisu dostavile godišnji finansijski izvještaj za 2022. godinu, pregled političkih stranaka koje nisu dostavile godišnji finansijski izvještaj za 2023. godinu, pregled političkih stranaka koje nisu dostavile godišnji finansijski izvještaj za 2024. godinu, evidenciju o političkim strankama koje su učestvovala na Općim izborima 2022. godine, evidenciju o političkim strankama koje su učestvovala na Lokalnim izborima 2024. godine i Odluku o prestanku rada Stranke za bolje Goražde, broj 05/21 od dana 30.03.2021. godine.

Uvidom u navedenu dokumentaciju, Sud je utvrdio da politička organizacija Stranka za bolje Goražde nije dostavljala godišnje finansijske izvještaje propisane članom 12. Zakona o finansiranju političkih stranaka za 2021, 2022, 2023. i 2024. godinu, da nije učestvovala na Općim izborima 2022. godine i Lokalnim izborima 2024. godine, te da je dana 30.03.2021. godine donijela Odluku broj 05/21 o prestanku rada Stranke za bolje Goražde, koja Odluka stupa na snagu danom donošenja.

Članom 24. stav 1. tačka 4) Zakona o političkim organizacijama („Službeni list SR BiH". broj 27/91-preuzet u Federaciji Bosne i Hercegovine) propisano je da politička organizacija prestaje sa radom ukoliko se utvrdi da ne obavlja djelatnosti utvrđene statutom u periodu dužem od jedne godine, te da navedene okolnosti utvrđuje sud i nakon toga političku organizaciju briše iz registra.

Kako politička organizacija Stranka za bolje Goražde ne obavlja djelatnost duže od godinu dana sud je temeljem odredbi člana 24. stav 1. tačka 4) Zakona o političkim organizacijama odlučio kao u izreci rješenja.



S u d i j a

Lejla Ferhatović

Pouka o pravnom lijeku:

Protiv ovog rješenja dozvoljena je žalba u roku od 8 dana od dana objavljivanja. Žalba se podnosi Kantonalnom sudu u Goraždu putem ovog suda.